

Schnitzelbank Sabrenas 2024

www.sabrenas.ch



Garantiert sicher

E Umfrog weg der Sicherheit wird offiziell gstartet,
wo überall e Dieb oder e Glüstler wartet.

Uf eim Gebiet isch d'Sicherheit ganz sicher garantiert:
Ob richtig oder falsch parkiert, für's Parkiere wird abkassiert.



Gschlosseni Gsellschaft

Ei Tag pro Wuche, am Wirtesunntig, sind Beize zue,
jede Wirt brucht sini wohlverdienti Rueh.

Vor em Adler schtosch, wie vor der Gmeindskanzlei, täglich am Hoffe,
vellicht isch do am e andere Tag emol e paar Stund offe.

Blablaba

Stundelang werde Parlamentswale diskutiert,
derbi isch das mit nur zwei Ziile schnell analysiert:
Die Rechte jubiliere, sie singe, sie tanze,
de Grüene goht der Schnuf us, die gheie uf der Ranze.



Friede, Freude, Eierkuchen

Knallhart Duregriffe isch der Baerbock ihres Ding,
boykottiere, chriege, frech zum Xi Jinping.
Das Bienli suecht der Kampf gege asiatische Hornisse.
Machs guet Annalena, mir werde di nit vermisse.



Künstliche Intelligenz (KI)

Auto und Hüüser funktioniere gli autonom.

Automatisch, mit ganz wenig Solarstrom.

Was machsch als Mensch, wenn für di nüt meh übrig bliibt,
will sogar s'Handy dini Message vu sich us selber schriibt?



Alti Liebi roschtet nit

Als Schnitzelbänkler hesch es schwer all Johr Neu's zämmedichte
und nit immer nur über die gliiche Theme briichte.

Jetzt hani gmerkt das interessiert kei Sau,
ich ha jo au sit drissig Johr dehei die gliichi Frau.



*Chinderfasnacht, Fasnachtsfüür und Chehrusgaudi
nit verpasse!*